

18/10/2003

Pemimpin sepakat laksana pelan tindakan 12

PUTRAJAYA: Sidang Kemuncak ke-10 Pertubuhan Persidangan Islam (OIC) berakhir di sini malam tadi dengan pemimpin 57 negara anggota sepakat untuk melaksanakan pelan tindakan 12 perkara bagi mengembalikan perpaduan, kesepakatan dan maruah ummah ketika dunia Islam menghadapi cabaran amat hebat.

Pelan tindakan merangkumi aspek politik, ekonomi dan sosial itu terkandung dalam Deklarasi Putrajaya, dikeluarkan pada akhir sidang yang dipengerusikan oleh Datuk Seri Dr Mahathir Mohamad, di Pusat Konvensyen Putrajaya.

Deklarasi Putrajaya Mengenai Ilmu Pengetahuan Dan Akhlak Bagi Perpaduan, Maruah Dan Kemajuan Ummah itu dibacakan oleh Menteri Luar, Datuk Seri Syed Hamid Albar.

Pemimpin OIC bersetuju untuk menyemak dan menganalisis kedudukan pertubuhan itu berhubung isu-isu antarabangsa dan menggariskan strategi sesuai bagi mengukuhkan perpaduan mereka terutama pada forum antarabangsa.

Mereka juga bersetuju menimbang cadangan mengenai Aturan Pembayaran Perdagangan Berasaskan Emas (GTPA) sebagai alternatif bagi urusan perdagangan di kalangan 57 negara anggota dalam usaha memantapkan pembangunan perdagangan dan ekonomi dunia Islam.

Langkah-langkah praktikal untuk menggalakkan perdagangan dan pelaburan juga akan diambil menerusi perkongsian pangkalan data dan mewujudkan hubungan dalam perkhidmatan kewangan, perkapalan dan penerbangan di kalangan negara anggota.

Selain itu, mereka bersetuju semakan menyeluruh Sekretariat Am OIC bagi merombak struktur, metodologi, memperbaiki keperluan kewangan dan sumber manusia, dan memastikan dokumentasi yang lebih fokus, padat bagi menjadikannya lebih berkesan, disiapkan dan dipertimbangkan pada Persidangan Menteri-Menteri Luar Islam (ICFM) akan datang.

Pemimpin OIC juga bersetuju mengadakan dialog dengan budaya dan tamadun lain, termasuk Barat dan pertubuhan antarabangsa, bagi mewujudkan kesederhanaan, persefahaman bersama dan meningkatkan penghargaan terhadap Islam sebagai agama yang menggalakkan keamanan dan keharmonian sesama manusia.

Dialog di antara ummah, terutama cendekiawan, intelektual, pakar undang-undang dan pembuat dasar dan institusi Islam sedia ada seperti Akademi Fekah juga akan dimanfaatkan dengan lebih giat.

Akademi Fekah dan Sekretariat Am pula akan distruktur semula dan diberikan mandat untuk mengkaji semua isu yang relevan bagi rujukannya yang akan menyumbang ke arah mewujudkan persefahaman lebih baik dan meminimumkan perbezaan pendapat di antara negara anggota.

Pemimpin OIC juga bersetuju memperkemas mekanisme sedia ada bagi membantu memulihkan negara anggota yang baru bebas daripada konflik selain mengambil langkah berkesan bagi menangani isu ekologi yang amat penting bagi survival manusia.

Tindakan lain ialah:

- * mewujudkan satu kumpulan perbincangan bagi mencadangkan bagaimana pendidikan Islam boleh menyumbang ke arah meningkatkan keamanan, persefahaman, toleransi, pembangunan ekonomi dan pemodenan, termasuk peningkatan dalam peranan wanita dalam pembangunan ekonomi.

- * menggalakkan pembangunan Sains dan Teknologi di kalangan negara anggota melalui persidangan tetap ahli sains, jurutera, pakar inovasi

serta pakar teknologi Islam bagi tujuan bertukar pandangan dan berkongsi pengalaman penyelidikan.

- * menubuhkan Tabung Khas OIC dan satu sistem yang sesuai untuk memberi anugerah kepada pencapaian yang memberangsangkan dalam bidang terbabit akan diwujudkan bagi menggalakkan aktiviti mereka.

- * mengadakan aktiviti interaksi serta pertukaran idea dan pandangan yang tetap antara kalangan cendekiawan, ahli perniagaan, usahawan, pengusaha industri dan pembuat dasar mengenai isu yang membabitkan ummah di kalangan umat Islam juga akan diadakan.

- * mewujudkan pelbagai program untuk meningkatkan kerjasama di antara negara-negara anggota dalam Teknologi Maklumat dan Komunikasi (ICT) bagi pembangunan berasaskan prinsip "perkongsian bestari" yang akan melibatkan sepenuhnya kerajaan, masyarakat dan sektor swasta.

- * menggalakkan negara anggota untuk menyumbang secara sukarela kepada Tabung Perpaduan Digital.